



STATUT

SOCIJALDEMOKRATSKE PARTIJE BOSNE I HERCEGOVINE

I - OPĆE ODREDBE

Član 1.

Statutom Socijaldemokratske partije Bosne i Hercegovine (u daljem tekstu: Statut) se utvrđuju: ciljevi Socijaldemokratske partije i način njihovog ostvarivanja; naziv, znak i sjedište; unutrašnja organizacija; uvjeti za učlanjivanje i prestanak članstva, kao i prava, obaveze i odgovornosti članova; organi i njihova prava, obaveze i odgovornosti, zastupanje i predstavljanje; način stjecanja, korištenja i raspoređivanja sredstava; način donošenja odluke o prestanku rada; koordiniranje i učešće Socijaldemokratske partije Bosne i Hercegovine (u daljem tekstu: SDP BiH) u vlasti, kao i druga pitanja od značaja za članstvo i djelovanje SDP BiH.

Član 2.

SDP BiH je jedini pravni sljedbenik Socijaldemokratske stranke BiH iz 1909. godine, KP BiH, SK BiH, SK BiH – SDP, Socijalističke demokratske partije BiH, SDP BiH, Saveza reformskih snaga BiH, UBSD-a i Socijaldemokrata BiH.

Član 3.

SDP BiH je jedinstvena politička multietnička organizacija, slobodnih, ravnopravnih i odgovornih članova, koja djeluje na teritoriji Bosne i Hercegovine na osnovama Programa SDP BiH (u daljem tekstu: Program) i u skladu sa ovim Statutom.

U ostvarivanju programskih ciljeva i zadataka SDP BiH surađuje s političkim strankama/partijama, udruženjima i pojedincima u Bosni i Hercegovini i inostranstvu.

SDP BiH je članica Socijalističke internacionale, a može se udružiti i u druga udruženja socijaldemokratske opcije i njihove saveze.

Član 4.

Polazeći od Programa SDP BiH osnovni ciljevi i zadaci SDP BiH su:

- izgradnja BiH kao demokratske države ravnopravnih građana i naroda, Bošnjaka, Hrvata, Srba i ostalih građana koji u njoj žive;
- afirmacija suvereniteta, teritorijalnog integriteta i političke nezavisnosti Bosne i Hercegovine u skladu sa međunarodnim pravom;
- afirmacija i aktivno ispoljavanje antifašizma kao civilizacijske tekovine savremenog svijeta;
- izgradnja SDP BiH kao savremene, demokratske i efikasne političke partije koja će svojom organizacijom i metodama političkog djelovanja ostvarivati bitan uticaj na građane i biračko tijelo u BiH;
- izgradnja bh. društva na osnovnim vrijednostima evropske socijaldemokratije: slobode, jednakosti, pravde i solidarnosti;
- uvažavanje, poštovanje i ostvarivanje temeljnih prava i sloboda čovjeka i građanina, u skladu sa međunarodnim konvencijama, neovisno o njegovom pogledu na svijet, vjerskoj, nacionalnoj i spolnoj pripadnosti, te političkom uvjerenju;
- izgradnja Bosne i Hercegovine kao socijalne, pravne i sekularne države sa punim vjerskim slobodama;
- uspostava demokratskog socijalizma na načelima slobode, jednakosti, demokratije i solidarnosti, sa jednakom šansom pojedinca na život dostojan čovjeka;
- uspostava pluralizma vlasništva od kojih se ni jedan oblik vlasništva ne može koristiti na štetu općih interesa;
- ostvarivanje prava radnika, lica koja žive od rada i na osnovu svog rada i znanja;
- ostvarivanje partnerskih odnosa sa sindikatima;
- uspostava socijalne tržišne privrede u kojoj rezultate razvoja uživaju svi građani i građanke Bosne i Hercegovine;
- izgradnja demokratskih odnosa u ekonomskim i socijalnim oblastima;
- borba protiv svih vrsta diskriminacije i socijalne isključenosti, afirmacija rodne ravnopravnosti, zajamčenih prava ljudi na zdravstvenu i socijalna sigurnost i zaštita, obrazovanje, radna, porodična i druga prava;

- uspostava odbrane i konsolidacije građanskih prava i sloboda emancipacijom građana i građanki od ekonomske, socijalne i kulturne podčinjenosti i inferiornosti i širenje tih sloboda i prava i eliminisanje zavisnosti građana i građanki od pojedinačnih ili grupnih ekonomskih moćnika;
- uspostava društva u kojem su ekonomski tokovi podređeni i u službi solidarnosti, dobrobiti društva i pojedinaca;
- uspostava održivog privrednog razvoja, uz ravnomjeran razvitak gradskih i seoskih područja;
- očuvanje kulturnog i socijalnog identiteta;
- izgradnja društvene, ekonomske i političke podloge za unapređivanje lokalne samouprave i uravnoteženja regionalnog razvoja; razvoja, uloge i odgovornosti velikih gradova kao pokretača komplementarnog razvitka;
- zaštita kulturne i prirodne baštine, te čovjekove okoline.

Član 5.

SDP BiH ostvaruje programske ciljeve na principima i osnovama savremene socijaldemokratije, evropskih standarda i parlamentarne demokratije.

Ove ciljeve SDP BiH ostvaruje učešćem na parlamentarnim izborima, u organima vlasti, oblikovanjem javnog mnijenja i drugim oblicima demokratskog parlamentarnog. i van parlamentarnog djelovanja.

Član 6.

SDP BiH ima svojstvo pravnog lica.

SDP BiH, u javnom i političkom životu, predstavlja i zastupa Predsjednik SDP BiH u skladu sa Programom, ovim Statutom i pozitivnim propisima BiH.

Predsjednik SDP BiH može ovlastiti druge osobe da zastupaju i predstavljaju SDP BiH u skladu sa ovim Statutom.

Član 7.

Puni naziv partije glasi : Socijaldemokratska partija Bosne i Hercegovine.

Skraćeni naziv partije glasi : SDP BiH - Socijaldemokrati BiH.

Sjedište SDP BiH je u Sarajevu, Ulica Alipašina br. 41.

Član 8.

SDP BiH ima svoj znak, zastavu i pečat.

Znak je ruža crvene boje, čije latice čine skraćenicu SDP BiH, i pored nje slova oznaka SDP ispisana na jednom od pisama (ćirilicom ili latinicom), crvene boje.

Zastava je pravougaonog oblika omjera strana 2:1 crvena sa znakom SDP BiH obrubljenim bijelom linijom.

Odlukom organa SDP BiH za različite manifestacije mogu se izraditi prigodne zastave.

Pečat SDP BiH je okruglog oblika, prečnika 3 cm, sa znakom SDP BiH (ružom) u sredini, oko koga je latinicom i ćirilicom ili latinicom ili ćirilicom ispisano: Socijaldemokratska partija Bosne i Hercegovine.

SDP BiH ima svoju svečanu pjesmu.

Korištenje i čuvanje pečata, znaka, zastave i svečane pjesme, uredit će se posebnom odlukom koju donosi Glavni odbor.

Član 9.

SDP BiH organizira "Dane SDP BiH", od 1.do 9. maja/svibnja.

Glavni odbor SDP BiH bliže određuje ciljeve, sadržinu i način organiziranja "Dana SDP BiH", kao i obilježavanje drugih datuma i jubileja SDP BiH, antifašističkog pokreta i oslobodilačkih težnji naroda Bosne i Hercegovine.

Član 10.

SDP BiH može dodjeljivati priznanja i nagrade za doprinos izgradnji, jačanju, ostvarivanju rezultata SDP BiH, te u realizaciji i afirmaciji Programa SDP BiH.

Kao priznanja SDP BiH može dodjeljivati medalje, plakete, povelje, značke i diplome. Priznanja i nagrade, te način njihove dodjele uređuje Glavni odbor posebnom odlukom.

II - ČLANSTVO

Član 11.

Članom SDP BiH može postati punoljetan građanin BiH koji dobrovoljno potpiše pristupnicu u osnovnoj organizaciji ili odgovarajućem odboru potvrđujući na taj način da prihvata Program SDP BiH i iskazujući spremnost da ispunji obaveze utvrđene ovim Statutom, pod uslovom da nije član druge političke organizacije.

Član SDP BiH svoja osnovna prava i obaveze, u pravilu, ostvaruje u osnovnoj organizaciji prema mjestu prebivališta.

Izuzetno prijem novih članova u SDP BiH mogu izvršiti i drugi organi SDP BiH. Prijem se vrši potpisivanjem pristupnice koja se dostavlja nadležnoj općinskoj/gradskoj organizaciji u kojoj novoprimljeni član ima prebivalište.

Član 12.

Odluku o potvrđivanju prijema u članstvo u pravilu donosi općinski ili gradski odbor na prvoj sjednici nakon potpisivanja pristupnice.

Nakon odluke o potvrđivanju prijema prava i obaveze novog člana računaju se od dana potpisivanja pristupnice.

Prijem novih članova može osporiti svaki član SDP BiH i svaki organ SDP BiH. Prigovor se dostavlja organu koji je izvršio potvrđivanje prijema, u roku od 30 dana od dana prijema.

U slučaju da organ koji je izvršio potvrđivanje prijema odbije prigovor kojim se osporava prijem, podnosilac prigovora ima pravo žalbe na odluku kojom se odbija prigovor.

Pravo na žalbu ima i lice kome je osporen prijem u članstvo.

Član 13.

Žalba protiv odluke općinskog/gradskog odbora kojom je odbijen prigovor kojim se osporava prijem ili je osporen prijem u članstvo novog člana podnosi se u roku od 15 dana od dana dostavljanja odluke kantonalnom/regionalnom odboru ukoliko on nije izvršio prijem.

Kantonalni/regionalni odbor dužan je u roku od 30 dana donijeti odluku po žalbi. Odluka kantonalnog/regionalnog odbora je konačna i protiv nje se ne može izjaviti žalba.

Kada je odluku o prijemu donio kantonalni/regionalni odbor žalba se u roku od 15 dana podnosi Glavnom odboru, koji na svojoj prvoj sjednici donosi konačnu odluku.

Član 14.

Protiv konačne odluke iz stava 1 do 3 prethodnog člana, u roku od 30 dana od njenog dostavljanja, nezadovoljna strana, može podnijeti zahtjev za preispitivanje statutarnosti odluke Nadzornom odboru.

Nadzorni odbor dužan je u roku od 30 dana ispitati osporenu odluku kad je u pitanju njena usklađenost sa Statutom. Nakon provedenog postupka Nadzorni odbor može utvrditi da njom nije povrijeđen Statut SDP BiH i odbiti zahtjev ili u slučaju utvrđenih povreda Statuta naložiti organu koji je odluku donio da obnovi postupak.

Član 15.

O prijemu u članstvo SDP BiH osoba koje su bile članovi rukovodstva drugih političkih organizacija ili su bili isključeni iz SDP BiH, odlučuje odbor odgovarajuće organizacije SDP BiH.

Ponovni prijem člana koji je brisan iz evidencije ili je bio isključen, moguć je pod uvjetom da zahtjev za ponovni prijem bude podnesen od strane imenovanog i razmatran na odboru općinske odnosno

gradske organizacije u kojoj se vodio na evidenciji. U odluci o ponovnom prijemu može se utvrditi da ponovno primljeni član tokom određenog vremena ne može vršiti nikakve funkcije u SDP BiH ili ispred SDP BiH, te biti imenovan ili izabran u izvršne ili predstavničke organe vlasti. Za postupak osporavanja prijema iz prethodnog stava važe odredbe iz članova od 12. do 14. Statuta.

Član 16.

O članovima SDP BiH vodi se jedinstveni registar članova.

Članovima SDP BiH izdaje se članska karta.

Izgled i sadržaj registra i članske kartice utvrđuje Glavni odbor SDP BiH posebnim pravilnikom.

Članstvo u SDP BiH može biti i počasno. Počasni član SDP BiH može biti samo osoba koja nema državljanstvo BiH.

Odluku o primanju u počasno članstvo donosi Glavni odbor na prijedlog Predsjedništva SDP BiH.

O počasnim članovima vodi se posebna evidencija, a status počasnih članova u organizaciji utvrđuje se posebnim pravilnikom koji donosi Glavni odbor.

Član 17.

Član SDP BiH ima prava i obaveze :

- da učestvuje u kreiranju i ostvarivanju politike SDP BiH;
- da se pridržava Statuta i programskih načela SDP BiH, te da provodi odluke stranačkih organa;
- da se zalaže i aktivno radi na ostvarivanju programskih ciljeva SDP BiH;
- da svojim djelovanjem i ponašanjem čuva i jača ugled SDP BiH;
- da se zalaže za unapređenje međusobnih odnosa i štiti ugled članova SDP BiH;
- da inicira i učestvuje u aktivnostima SDP BiH;
- da pridobija nove članove SDP BiH;
- da bira i da bude biran/birana u organe SDP BiH;
- da bude kandidat SDP BiH za predstavničke i izvršne organe vlasti;
- da pokreće inicijative za rad SDP BiH i njegovih organa;
- da se i sam kandiduje za izbore u postupku kandidovanja;
- da bude informiran o svim pitanjima i aktivnostima organa SDP BiH;
- da javno iskazuje svoje mišljenje;
- da sudjeluje u aktivnostima SDP BiH;
- da ostvaruje druga prava i izvršava druge obaveze u skladu sa odredbama Statuta i odluka donesenih na osnovu Statuta.

Članovi SDP BiH uživaju punu slobodu vjerskih uvjerenja, uključujući i slobodu od vjere, kao i slobodu iskazivanja vjerskog i nacionalnog identiteta.

Član 18.

Član je dužan redovno plaćati članarinu, osim ako je te obaveze oslobođen u propisanom postupku odlukom nadležnog općinskog odbora SDP BiH.

Članarina se isključivo koristi za finansiranje rada općinske/gradske organizacije SDP BiH.

Visina članarine zavisi od vrste primanja i socijalnog stanja svakog člana:

- za zaposlene;
- za nezaposlene, učenike, studente i penzionere;
- za članove koji ostvaruju nadoknade koje proizlaze iz mandata SDP BiH;
- za članove koji primaju redovnu plaću iz mandata SDP BiH.

Obaveze i prava iz prethodnih stavova ovog člana utvrđuju se posebnom odlukom Glavnog odbora.

Član može davati materijalnu pomoć SDP BiH u obliku donacija i drugih oblika pomoći u skladu sa

Zakonom o finansiranju političkih partija.
Davanjem materijalne pomoći SDP BiH niko ne može ostvarivati dodatna ili posebna prava.

Član 19.

Član koji nije platio članarinu najmanje šest mjeseci, ili je istu retroaktivno uplatio u procesu kandidovanja, a nije oslobođen te obaveze u skladu sa posebnom odlukom Glavnog odbora, ne može biti kandidat za partijske funkcije, niti kandidat SDP BiH na izborima za zakonodavne organe vlasti bilo kojeg nivoa, odnosno za pozicije u organima koji se imenuju na prijedlog SDP BiH.

Član 20.

U SDP BiH pored jedinstvenog registra članova vodi se i jedinstveni registar simpatizera SDP BiH. Simpatizer SDP BiH može biti svaki punoljetan građanin BiH koji prihvata Program SDP BiH i u skladu sa odredbama ovog Statuta sudjeluje u aktivnostima SDP BiH. Izgled i sadržaj registra simpatizera SDP BiH utvrđuje Glavni odbor SDP BiH posebnim pravilnikom.

Član 21.

Članstvo u SDP BiH prestaje:

- istupanjem člana iz SDP BiH (pisanom izjavom ili aktom povrata članske iskaznice);
- brisanjem iz evidencije članstva SDP BiH;
- isključenjem.

Član 22.

Član SDP BiH briše se iz evidencije članova SDP BiH u slučaju:

- učlanjenja u drugu političku stranku/partiju;
- kandidovanja na listi druge političke stranke/partije, nezavisnoj listi ili kao nezavisni kandidat bez saglasnosti organa SDP BiH;
- prelaska u nezavisne poslanike odnosno vijećnike/odbornike;
- ako godinu dana ne plaća članarinu, a iste obaveze nije oslobođen na osnovu odluke odgovarajućeg organa, ako svoju obavezu ne izvrši u roku od 30 dana od dana dostavljanja pisanog upozorenja.

Odluku o brisanju iz evidencije donosi općinski odbor, odnosno gradski odbor.

Član SDP BiH može u roku od 8 dana, od dana dostavljanja odluke, uložiti žalbu Nadzornom odboru SDP BiH organizacije koja je donijela odluku, koji je dužan o žalbi odlučiti u roku od 30 dana..

Do konačnosti odluke prava i obaveze člana miruju.

Odluka Nadzornog odbora SDP BiH je konačna.

Član 23.

Protiv člana čije je ponašanje i djelovanje usmjereno protiv odluka partijskih organa ili nečasnim djelima ili svojim postupcima krši Statut, programska načela i ciljeve, te tako šteti ugledu SDP BiH, provodi se partijski postupak.

Partijski postupak provodi općinski ili gradski odbor, odnosno nadležni odbor za članove organa SDP BiH na vlastitu inicijativu odnosno na prijedlog za utvrđivanje odgovornosti koji može podnijeti kantonalni/regionalni odbor ili Glavni odbor SDP BiH.

Član 24.

U partijskom postupku mogu se izreći mjere:

- opomena
- isključenje iz SDP BiH.

Opomena se izriče za ponašanje iz člana 15. stav 1. kojima je nanosena manja šteta SDP BiH i kada se ocijeni da će ta mjera imati pozitivan učinak na njegove daljnje postupke, aktivnosti i djelovanje u SDP BiH.

Isključenje iz SDP BiH može se izreći članu za teže oblike povreda iz člana 15. stav 1. kojima je SDP BiH nanosena znatna šteta.

Odluku o opomeni, odnosno odluku o isključenju donosi općinski ili gradski odbor, odnosno nadležni odbor za članove organa SDP BiH.

Član 25.

Osnova za donošenje odluke je usmena rasprava.

Odlukom nadležnog organa o provođenju partijskog postupka iz člana 15. stav 2 utvrđuju se ovlaštena lica iz sastava organa za provođenje usmene rasprave i rok za podnošenje izvještaja o rezultatima usmene rasprave sa prijedlogom odluke.

U partijskom postupku moraju se navesti prigovori i dokazi (dokumenti, izjave...) koji se stavljaju na teret člana protiv koga se vodi postupak.

Član protiv kojeg se vodi postupak poziva se obavezno na usmenu raspravu bez obzira pred kojim organom se postupak vodi.

Svi organi u prvom i drugom stepenu odlučivanja dužni su na zahtjev člana protiv kojeg se postupak vodi osigurati prisustvo jednog člana SDP BiH kao njegovu podršku u sporu.

O usmenoj raspravi vodi se zapisnik sa sadržajem rasprave.

Sudionici rasprave mogu tražiti da se njihove izjave doslovno unesu u zapisnik.

O izvještaju sa usmene rasprave i prijedlogu odluke vodi se rasprava na nadležnom odboru.

Član 26.

Izuzetno, u slučajevima kada ocijeni da bi provođenje redovnog partijskog postupka dovelo do štete po SDP BiH, Predsjedništvo SDP BiH može odmah sa svih funkcija suspendirati člana i ako procijeni da njegovo ponašanje i djelovanje šteti ugledu SDP BiH predložiti Glavnom odboru da ga isključi iz SDP BiH.

Odluku o isključenju na prijedlog Predsjedništva SDP BiH Glavni odbor donosi na prvoj narednoj sjednici.

Protiv ovako donesene odluke o isključenju član se može žaliti Nadzornom odboru SDP BiH u roku od 15 dana od dana dostavljanja odluke.

Nadzorni odbor je dužan odlučiti o žalbi u roku od 30 dana.

Član 27.

Odluke o isključenju moraju biti u pisanom obliku, obrazložene sa poukom o žalbi i u pravilu se dostavljaju preporučenom pošiljkom.

Protiv odluke o isključenju član može izjaviti žalbu u roku od 30 dana od dana dostavljanja Nadzornom odboru SDP BiH, koji je dužan o žalbi odlučiti u roku od 60 dana.

Kad odlučuje o žalbi člana protiv kojeg se vodi stranački postupak Nadzorni odbor na svojoj sjednici obavezno poziva podnositelja žalbe, te predstavnika tijela koje je donijelo odluku ili traži pisano izjašnjenje tog tijela.

Odlučujući o žalbi Nadzorni odbor je može potvrditi ili ukinuti i vratiti na ponovno odlučivanje.

Do konačnosti odluke o izrečenoj mjeri, prava i obaveze člana miruju.

Odluka Nadzornog odbora SDP BiH je konačna.

Član 28.

Isključeni član može podnijeti zahtjev za ponovno primanje u članstvo.

Zahtjev se podnosi Predsjedništvu SDP BiH uz prethodno mišljenje općinskog odnosno gradskog odbora.

Zahtjev za ponovni prijem ne može se podnijeti prije isteka roka od godinu dana od dana

donošenja konačne odluke o isključenju.
Predsjedništvo SDP BiH dužno je u roku od 60 dana donijeti odluku o zahtjevu za ponovni prijem.

Član 29.

Demokratski princip je osnovno načelo za utvrđivanje politike SDP BiH i djelovanje organizacija, organa i tijela SDP BiH.

Sve funkcije u SDP BiH jednako su dostupne ženama i muškarcima.

Svi članovi SDP BiH imaju pravo da pokreću inicijative i postavljaju pitanja organima i nosiocima funkcija u SDP BiH koja se odnose na provođenje Programa SDP BiH, Statuta SDP BiH i unutarpartijska pitanja.

Organ kojem je pitanje postavljeno i prema kome je upućena inicijativa dužan je na iste odgovoriti u roku od 30 dana, odnosno odmah poslije prve sjednice organa kojem je inicijativa upućena.

Član 30.

U cilju utvrđivanja volje članstva i jačanja njihovog utjecaja na politiku i djelovanje SDP BiH o najbitnijim pitanjima politike i razvoja, može se organizovati anketa članstva i općepartijska rasprava.

Odluku o provođenju općepartijske ankete donosi Glavni odbor SDP BiH.

Za druge nivoe organizovanja SDP BiH, odluku o anketi donose odgovarajući odbori SDP BiH isključivo iz domena svog rada i za pitanja koja se tiču nivoa na kojem su organizovani, uz prethodno pribavljeno mišljenje o sadržaju ankete od strane Glavnog odbora SDP BiH.

U Odluci o provođenju ankete utvrđuju se anketna pitanja, način njenog provođenja i razmatranje rezultata ankete.

III - ODNOSI U SDP BiH

Član 31.

U SDP BiH je dozvoljeno pravo na javno iskazivanja manjinskog mišljenja.

Manjinsko mišljenje ne može biti u suprotnosti sa Programom SDP BiH.

U SDP BiH nije dopušteno institucionaliziranje manjinskog mišljenja u organiziranom obliku, odnosno frakcijskom djelovanju.

Član 32.

U aktivnostima SDP BiH, na svim nivoima organiziranja i oblicima djelovanja, mogu učestvovati i simpatizeri SDP BiH bez prava odlučivanja.

Općinski odbori i osnovne organizacije SDP BiH su obavezni da najmanje jednom godišnje organiziraju javne skupove članova i simpatizera SDP BiH u cilju unapređenja djelovanja.

Član 33.

U SDP BiH organizira se sistem zaštite članova i to:

- Pravno savjetovište
- Fond solidarnosti SDP BiH.

Odluku o sistemu zaštite članova SDP BiH donosi Glavni odbor SDP BiH.

Član 34.

Rad i djelovanje SDP BiH je javno.

Javnost rada i djelovanje članstva, organizacija, organa i SDP BiH u cjelini ostvaruje se na javnim skupovima, tribinama, sudjelovanjem na okruglim stolovima, putem sredstava javnog informisanja i na druge načine, uspostavljajući odnose i djelujući na javno mnijenje građana, birača, simpatizera

i članova SDP BiH.

Javno djelovanje osigurava se i sjednicama, odnosno sastancima organa SDP BiH otvorenim za javnost, konferencijama za novinare, izjavama i saopštenjima za javnost.

Organizacije i organi SDP BiH, kada to procijene članovi organa, mogu raspravljati i odlučivati bez prisustva javnosti o unutarstranačkim i drugim bitnim pitanjima.

Član 35.

Organi SDP BiH punovažno odlučuju kada je prisutno više od polovine od ukupnog broja njihovih članova, a Kongres ako je prisutno više od dvije trećine od ukupnog broja delegata.

Organi donose odluke većinom glasova prisutnih članova, osim ako ovim Statutom nije drugačije određeno.

Član 36.

Glasanje u organima SDP BiH, u pravilu, je javno.

Izbor organa SDP BiH vrši se tajnim glasanjem između više kandidata, osim kad to nije moguće osigurati u procesu kandidovanja.

Mandatni period za sve funkcije u SDP BiH, na svim nivoima organizovanja, je četiri godine.

Sve čelne – inokosne funkcije u SDP BiH mogu se obavljati najviše u dva uzastopna mandatna perioda, izuzev funkcija člana u svim kolektivnim organima SDP BiH za koje važi ograničenje od najviše tri uzastopna mandatna perioda.

IV – ORGANIZACIONA STRUKTURA I ORGANI SDP BiH

Član 37.

SDP BiH se organizira na teritorijalnom načelu.

Članstvo SDP BiH teritorijalno se organizira u slijedeće osnovne oblike:

- Socijaldemokratska partija BiH;
- Kantonalne/regionalne organizacije SDP BiH;
- Gradske organizacije SDP BiH;
- Općinske organizacije SDP BiH.;
- Osnovna organizacija SDP BiH;
- u mjestima, općinama, gradovima i kantonima/regijama gdje nisu formirane organizacije SDP BiH djeluju povjerenici, odnosno povjerenstva SDP BiH.

Član 38.

U sklopu organizacije SDP BiH mogu se formirati interesne zajednice, forumi, savjeti, projektne radne grupe i drugi oblici u koje se povezuju socijalne i interesne grupacije ili pojedinci – članovi, simpatizeri SDP BiH u dijaspori, nezaposleni, penzioneri, borci, zdravstveni radnici, radnici u oblasti obrazovanja i kulture, poslodavci i drugi.

Odluku o formiranju interesnih oblika donosi odgovarajući odbor. Odlukom odbora utvrđuje se način organizovanja, djelokrug rada, unutrašnja organizacija i način djelovanja i odnosi sa organima SDP BiH.

Svi interesni oblici djeluju u skladu sa programskim opredjeljenjima i statutarnim principima SDP BiH.

Član 39.

U SDP BiH djeluje posebna organizacija mladih članova i simpatizera SDP BiH, pod nazivom Forum mladih SDP BiH, kao interesno-politički oblik organizovanja.

Glavni odbor SDP BiH donosi odluku o organiziranju Foruma mladih SDP BiH.

Forum mladih SDP BiH odlukom bliže uređuje način svoga organiziranja, djelovanja i osnivanja interesnih oblika.

Član 40.

U SDP BiH djeluje posebna organizacija žena – članica i simpatizerki SDP BiH, pod nazivom Forum žena SDP BiH, kao interesno-politički oblik organizovanja..

Glavni odbor SDP BiH donosi odluku o organiziranju Foruma žena SDP BiH.

Forum žena SDP BiH odlukom bliže uređuje način svoga organiziranja i djelovanja.

Član 41.

U SDP BiH djeluje posebna organizacija sindikalnih aktivista – simpatizera SDP BiH, pod nazivom Forum sindikalnih aktivista SDP BiH, kao interesno-politički oblik organizovanja..

Glavni odbor SDP BiH donosi odluku o organiziranju Foruma sindikalnih aktivista SDP BiH.

Forum sindikalnih aktivista SDP BiH odlukom bliže uređuje način svog organiziranja i djelovanja.

Član 42.

U SDP BiH djeluje posebna organizacija lica starije dobi i penzionera Forum seniora, kao interesno-politički oblik organizovanja.

Glavni odbor SDP BiH donosi odluku o organiziranju Foruma seniora SDP BiH.

Forum seniora SDP BiH odlukom bliže uređuje način svog organiziranja i djelovanja.

Član 43.

Članovi Foruma mogu biti i građani koji nisu članovi SDP BiH ako prihvataju programska usmjerenja i političke ciljeve SDP BiH.

IV 1. Socijaldemokratska partija Bosne i Hercegovine

Član 44.

SDP BiH kao jedinstvena multietnička politička organizacija obuhvata cjelokupno članstvo i sve organizacijske oblike SDP BiH na području Bosne i Hercegovine

Socijaldemokratska partija Bosne i Hercegovine u pravnom prometu djeluje kao jedna pravna osoba.

Član 45.

Organi SDP BiH su:

- Kongres,
- Glavni odbor,
- Predsjedništvo,
- Predsjednik,
- Nadzorni odbor.

IV 1.1 Kongres Socijaldemokratske partije Bosne i Hercegovine

Član 46.

Kongres je najviši organ odlučivanja u SDP BiH.

Kongres sačinjavaju delegati koji su izabrani u općinskim organizacijama SDP BiH, Predsjednik SDP BiH, članovi Glavnog odbora SDP BiH i članovi Nadzornog odbora SDP BiH.

Izbor delegata vrši se prema odluci Glavnog odbora SDP BiH, po osnovu registriranog broja članova općinskih organizacija i izbornih rezultata na općinskom, kantonalnom/regionalnom nivou, nivou entiteta i na nivou države Bosne i Hercegovine.

Svaka općinska organizacija SDP BiH zastupljena je na Kongresu sa najmanje jednim delegatom. Broj delegata Kongresa ne može biti manji od odnosa 3 : 1, niti veći od odnosa 5 : 1 u korist delegata koji su izabrani u općinskim organizacijama SDP BiH.

Na Kongresu učestvuju, ali bez prava odlučivanja, ukoliko nisu delegati po drugom osnovu: članovi SDP BiH koji obavljaju funkciju člana Predsjedništva BiH, poslanici u Parlamentarnoj skupštini Bosne i Hercegovine, Parlamentu Federacije BiH, Narodnoj skupštini Republike Srpske, članovi Vijeća ministara Bosne i Hercegovine, članovi Vlade Federacije Bosne i Hercegovine, članovi Vlade Republike Srpske, članovi Sekretarijata SDP BiH, Predsjednici kantonalnih/regionalnih odbora SDP BiH, Predsjednici općinskih odbora SDP BiH, predstavnici Foruma mladih SDP BiH, Foruma žena SDP BiH, Foruma sindikalnih aktivista SDP BiH i Foruma seniora.

Član 47.

Kongres se održava jednom u četiri godine, najkasnije 30 dana od dana kada ističe mandat organima SDP BiH izabranim na prethodnom Kongresu.

Odluku o održavanju Kongresa donosi Glavni odbor SDP BiH.

Odlukom se određuje prijedlog dnevnog reda Kongresa, način izbora i broj delegata Kongresa. Kongres saziva i rukovodi njegovim radom, do izbora radnog rukovodstva, Predsjednik SDP BiH. Kongres SDP BiH obavezno se održava u roku od šest mjeseci od trenutka kada bilo koji organ SDP BiH kojeg je birao Kongres, iz bilo kojeg razloga, prestane obavljati funkciju na koju je izabran.

Član 48.

Kongres se saziva najmanje dva mjeseca prije njegovog održavanja.

Plan rada i prijedlozi dokumenata dostavljaju se delegatima najkasnije mjesec dana prije održavanja Kongresa.

Član 49.

Kongres vrši provjeru legitimacije delegata putem Verifikacione komisije, obavlja izbor radnog rukovodstva i donosi Poslovnik o radu Kongresa SDP BiH.

Kongres punovažno odlučuje ako je prisutno više od dvije trećine delegata Kongresa.

Kongres donosi odluke većinom glasova registriranih/verifikovanih delegata Kongresa.

Kongres dvotrećinskom većinom registriranih/verifikovanih delegata Kongresa donosi i mijenja Program i Statut SDP BiH i odluku o udruživanju sa drugim političkim organizacijama.

Član 50.

Kongres je nadležan da:

- donosi i mijenja Program i Statut SDP BiH;
- donosi odluke o prijedlozima upućenim Kongresu;
- donosi odluke, deklaracije, rezolucije i druge akte iz svoje nadležnosti;
- raspravlja i odlučuje o usvajanju izvještaja o radu Predsjednika, Glavnog odbora, Nadzornog odbora i Predsjedništva SDP BiH između dva kongresa;
- bira Glavni odbor, Nadzorni odbor i Predsjednika SDP BiH;
- odlučuje o udruživanju sa drugim političkim organizacijama, ako se time stvara nova stranka;
- odlučuje o prestanku rada SDP BiH nakon provedenog referenduma članstva SDP BiH;
- odlučuje o raspodjeli imovine u slučaju prestanka rada SDP BiH;
- odlučuje o povjerenju Predsjedniku SDP BiH, te o raspuštanju Glavnog i Nadzornog odbora SDP BiH;
- odlučuje o statutarnim prigovorima organa na odluke donesene između dva kongresa;
- donosi poslovnik o radu Kongresa SDP BiH;
- razmatra druga pitanja vezana za djelovanje SDP BiH.

Član 51.

Izbor članova Glavnog odbora SDP BiH, Nadzornog odbora SDP BiH, Predsjednika SDP BiH, na prijedlog Glavnog odbora SDP BiH vrši se tajnim glasanjem između kandidata koji su prihvatili kandidaturu, a na osnovu provedene procedure evidentiranja i kandidovanja za organe SDP BiH propisane posebnim aktom Glavnog odbora.

Najmanje jedna petina registriranih/verifikovanih delegata može i na samom Kongresu da podnese dopunski prijedlog kandidata za Predsjednika, a najmanje jedna desetina delegata za člana Glavnog i Nadzornog odbora SDP BiH.

Za članove Glavnog odbora SDP BiH i članove Nadzornog odbora SDP BiH izabrani su oni kandidati koji su dobili najveći broj glasova u skladu sa Poslovníkom uz poštivanje kriterija iz člana 42 ovog Statuta.

Član 52.

Predsjednik SDP BiH, Predsjednik/ Glavnog odbora SDP BiH, i Predsjednik Nadzornog odbora SDP BiH ne mogu biti iz reda istog naroda, uključujući i Ostale.

Potpredsjednici SDP BiH su iz reda konstitutivnih naroda i Ostalih, a najmanje jedan je predstavnik manje zastupljenog spola.

Potpredsjednici Glavnog odbora SDP BiH i Nadzornog odbora SDP BiH ne mogu biti iz reda istog naroda, uključujući i Ostale, a najmanje jedan je predstavnik manje zastupljenog spola, nastojeći ispoštovati teritorijalnu zastupljenost.

IV 1.1 A Vanredni kongres SDP BiH

Član 53.

Vanredni kongres SDP BiH saziva se kada Glavni odbor SDP BiH ocijeni da je to neophodno zbog izuzetnosti prilika u državi Bosni i Hercegovini ili u SDP BiH.

Odluku o održavanju Vanrednog kongresa SDP BiH donosi Glavni odbor 2/3 većinom od ukupnog broja članova Glavnog odbora.

Vanredni kongres SDP BiH saziva Predsjednik SDP BiH.

Predsjednik SDP BiH je dužan sazvati Vanredni kongres SDP BiH i kada to od njega zatraži najmanje jedna petina općinskih odbora SDP BiH, od ukupnog broja općinskih odbora SDP BiH iz najmanje tri različite kantonalne/regionalne organizacije SDP BiH.

Ako Predsjednik SDP BiH ne postupi prema zahtjevima iz stava jedan i četiri ovog člana u roku od mjesec dana od prijema zahtjeva, Kongres SDP BiH mogu sazvati organi koji su to tražili.

Predsjednik SDP BiH može sazvati Vanredni kongres SDP BiH ako ocijeni da Glavni odbor SDP BiH ili Predsjedništvo SDP BiH svojim odlukama krše Program i Statut SDP BiH.

U slučaju iz stava četiri, pet i šest, delegati biraju se u skladu sa Statutom i Odlukom o izboru delegata prethodnog Kongresa SDP BiH.

Član 54.

Vanredni kongres SDP BiH mora se sazvati tri nedjelje prije njegovog održavanja.

Prijedlozi odluka i drugih dokumenata za Vanredni kongres SDP BiH dostavljaju se delegatima najmanje pet dana prije održavanja kongresa.

Vanredni kongres SDP BiH radi po proceduri redovnog kongresa.

IV 1.2 Glavni odbor SDP BiH

Član 55.

Glavni odbor SDP BiH je najviši organ SDP BiH između dva kongresa.

Glavni odbor SDP BiH broji 110 članova koje bira Kongres SDP BiH vodeći računa o teritorijalnoj, nacionalnoj, socijalnoj, spolnoj i starosnoj zastupljenosti članova SDP BiH..

Punopravni članovi Glavnog odbora po funkciji su Predsjednici kantonalnih/regionalnih odbora SDP BiH, predsjednici interesnih oblika organizovanja i savjeta Glavnog odbora ukoliko već nisu članovi po drugom osnovu.

U Glavni odbor SDP BiH iz svake kantonalne/regionalne organizacije SDP BiH biraju se najmanje dva člana Glavnog odbora SDP BiH.

U Glavni odbor SDP BiH bira se najmanje 20% predstavnika svakog od konstitutivnih naroda, najmanje 3% predstavnika iz reda ostalih naroda koji žive u BiH, najmanje 35% manje zastupljenog spola, najmanje 30% članova do 35 godina starosti i najmanje 10% članova preko 60 godina starosti.

Glavni odbor SDP BiH odlukom o kandidovanju i izboru članova organa SDP BiH osigurava mehanizme za poštivanje kriterija iz prethodnog stava.

Članovi Glavnog odbora SDP BiH biraju se na period od četiri godine.

Ako između dva Kongresa član Glavnog odbora bude izabran na dužnost nespojivu sa članstvom u Glavnom odboru ili zbog nekog drugog razloga više ne može obavljati svoju dužnost, Glavni odbor može na njegovo mjesto kooptirati novog člana koji je na listi kandidata za Glavni odbor dobio najveći broj glasova nakon kandidata koji su izabrani na Kongresu ne narušavajući strukturu Glavnog odbora.

Broj kooptiranih članova između dva Kongresa ne može biti veći od 20% ukupnog broja izabranih članova Glavnog odbora.

Glavni odbor SDP BiH može između dva kongresa donijeti odluku o povećanju broja članova Glavnog odbora SDP BiH do 10%. Izbor novih članova Glavnog odbora SDP BiH vrši Glavni odbor SDP BiH na prijedlog Predsjedništva SDP BiH.

Odredbes prethodnih stavova koje se odnose na kooptiranje članova glavnog odbora i odluku o povećanju broja članova primjenjuju se i na kantonalne/regionalne, te općinske odnosno gradske odbore SDP BiH.

Član 56.

Glavni odbor SDP BiH:

- provodi i odgovoran je za provođenje odluka Kongresa;
- bira i razrješava Predsjednika i do četiri potpredsjednika Glavnog odbora;
- natpolovičnim brojem izabranih članova Glavnog odbora SDP BiH (u daljem tekstu «kvalifikovanom većinom») utvrđuje prijedlog Programa i Statuta SDP BiH, te njihove izmjene i dopune;
- donosi odluku o održavanju Kongresa SDP BiH;
- donosi odluku o održavanju vanrednog Kongresa SDP BiH;
- utvrđuje prijedloge kongresnih dokumenata;
- kvalifikovanom većinom bira Predsjedništvo SDP BiH, potpredsjednike SDP BiH i generalnog sekretara iz reda članova Glavnog odbora SDP BiH koji su direktno izabrani u Glavni odbor;
- kvalifikovanom većinom razrješava Predsjedništvo SDP BiH, potpredsjednike SDP BiH i generalnog sekretara;
- utvrđuje političke stavove SDP BiH o političkim, ekonomskim i socijalnim pitanjima vezanim za rad SDP BiH;
- na prijedlog Predsjedništva SDP BiH utvrđuje kriterije i način kandidovanja za izbor kandidata za organe vlasti;
- na prijedlog Predsjedništva utvrđuje kriterije za izbor kandidata za sve organe SDP BiH;
- utvrđuje liste kandidata za organe SDP BiH koje bira Kongres;
- na prijedlog Predsjedništva odnosno Predsjednika donosi izborni program i odluku o kandidatima za Skupštinu BiH, Predsjedništvo BiH, Parlament Federacije i Narodnu skupštinu Republike Srpske;
- analizira izbornu aktivnost i rezultate izbora;
- donosi Odluku o održavanju Konvencije SDP BiH sa okvirnim prijedlogom dnevnog reda;
- donosi Odluku o formiranju Sekretarijata na prijedlog generalnog sekretara SDP BiH;
- kvalifikovanom većinom odlučuje o tumačenju Statuta SDP BiH;
- kvalifikovanom većinom donosi odluke o pokretanju postupka nepovjerenja Predsjedniku SDP BiH;
- ukoliko Glavni odbor nakon provedenog postupka izglasa nepovjerenje Predsjedniku SDP BiH zakazuje se vanredni Kongres SDP BiH;
- donosi odluke i opće akte određene ovim Statutom;
- donosi odluku o osnivanju teritorijalnih i interesnih organizacija SDP BiH u skladu sa ovim Statutom;

- donosi odluku o organizovanju i djelovanju članova SDP BiH u inostranstvu i članova SDP BiH koji imaju status raseljenih i izbjeglih lica;
- donosi, u vanrednim prilikama, akt statutarnog važenja kojim se utvrđuje organizacija i djelatnost SDP BiH do prestanka vanrednih prilika;
- kvalifikovanom većinom, na prijedlog Predsjedništva odnosno Predsjednika, donosi odluke o stvaranju koalicije sa drugim strankama demokratske orijentacije;
- donosi odluke o članstvu SDP BiH u međunarodnim asocijacijama;
- u slučajevima bitnih razlika u ocjenama i stavovima može pokrenuti postupak za izglasavanje nepovjerenja Predsjedniku na Kongresu SDP BiH;
- utvrđuje politiku upravljanja imovinom SDP BiH;
- razmatra i utvrđuje finansijsku politiku, te usvaja finansijske planove i izvještaje;
- odlučuje o formiranju preduzeća ili drugih oblika za obavljanje privrednih ili drugih djelatnosti u skladu sa zakonom;
- formira i imenuje svoje savjete u skladu sa potrebama SDP BiH, a njihov broj i način rada regulira posebnim aktom;
- brine o politici informiranja unutar SDP BiH;
- najmanje jednom godišnje analizira rad zastupnika SDP BiH u Državnom i entitetskim parlamentima na zajedničkoj sjednici sa Klubovima zastupnika;
- najmanje jednom godišnje analizira rad KO/RO i interesnih oblika organizovanja SDP BiH;
- odlučuje i o drugim pitanjima iz života i rada SDP BiH koja Statutom ili drugim aktima nisu stavljena u nadležnost drugim organima SDP BiH;
- donosi Poslovnik o svom radu
- usvaja Etički kodeks SDP BiH.

Član 57.

U slučaju potrebe Glavni odbor može donositi odluke sa statutarnom snagom, koje ne mogu umanjiti statutarna prava članova SDP BiH, nadležnost oblika djelovanja članstva i organa SDP BiH na svim nivoima političkog organizovanja.

Izuzetno u slučajevima promjena teritorijalnog uređenja Bosne i Hercegovine može se statutarnom odlukom drugačije urediti status i uloga organizacija.

Odluke sa statutarnom snagom Glavni odbor donosi dvotrećinskom većinom od ukupnog broja članova Glavnog odbora.

Glavni odbor odluke sa statutarnom snagom podnosi na verifikaciju Kongresu SDP BiH.

Član 58.

Predsjednik SDP BiH saziva Konstituirajuću sjednicu Glavnog odbora u roku od 30 dana, od dana izbora, i njom rukovodi do izbora predsjednika Glavnog odbora.

Radom Glavnog odbora SDP BiH rukovodi predsjednik Glavnog odbora SDP BiH.

Član 59.

U slučaju vanrednih prilika, neposredne ratne opasnosti ili ratnog stanja, funkcije Glavnog odbora SDP BiH vrši Predsjedništvo SDP BiH, prošireno Predsjednikom i potpredsjednicima Glavnog odbora SDP BiH.

Član 60.

Na sjednice Glavnog odbora SDP BiH pozivaju se predsjednici klubova zastupnika SDP BiH u Parlamentarnoj skupštini BiH, Parlamentu FBiH, Narodnoj skupštini RS, Predsjednik SDP BiH, i članovi Sekretarijata SDP BiH.

Član 61.

Glavni odbor radi u sjednicama.

Sjednice Glavnog odbora mogu biti redovne i hitne, a po potrebi se mogu održavati svečane i komemorativne, što se reguliše poslovníkom.

U radu Glavnog odbora po potrebi mogu učestvovati predsjednici gradskih i općinskih odbora SDP BiH.

Član 62.

Sjednice Glavnog odbora SDP BiH održavaju se najmanje jednom u tri mjeseca. Saziva ih predsjednik Glavnog odbora SDP BiH, a u slučaju njegove spriječenosti jedan od potpredsjednika Glavnog odbora SDP BiH. Na zahtjev Predsjednika SDP BiH, Predsjedništva SDP BiH ili dvadeset članova Glavnog odbora SDP BiH, predsjednik Glavnog odbora SDP BiH je dužan sazvati hitnu sjednicu Glavnog odbora SDP BiH i na dnevni red staviti pitanja koja su podnositelji zahtjeva tražili. Ukoliko predsjednik Glavnog odbora SDP BiH ne sazove sjednicu u roku od 15 dana, sjednicu saziva ovlašteni predstavnik podnositelja zahtjeva, koji predlaže dnevni red i predsjedava sjednicom.

Član 63.

Glavni odbor SDP BiH punovažno odlučuje ako sjednici prisustvuje većina članova, a odluke donosi natpolovičnom većinom prisutnih članova, izuzev odluka za koje je ovim Statutom utvrđeno drugačije.

Ukoliko ovim Statutom nije drugačije uređeno odredba iz prethodnog stava primjenjuje se kod odlučivanja u svim organima SDP BiH na svim nivoima organizovanja. Informacija o radu Glavnog odbora SDP BiH najmanje jednom godišnje upućuje se članstvu SDP BiH putem kantonalnih/regionalnih i općinskih/gradskih odbora koji u roku od 30 dana mogu dostaviti svoja mišljenja, prijedloge i sugestije. Glavni odbor na prvoj svojoj sjednici razmatra pristigla mišljenja, primjedbe i sugestije, te se očituje o njima.

IV 1.3 Predsjedništvo SDP BiH

Član 64.

Predsjedništvo SDP BiH je izvršno-politički organ SDP BiH. Glavni odbor SDP BiH, na svojoj konstituirajućoj sjednici, bira: potpredsjednike SDP BiH, Generalnog sekretara SDP BiH i 13 članova Predsjedništva SDP BiH. Predsjednik SDP BiH po položaju je predsjednik Predsjedništva SDP BiH. Predsjedništvo SDP BiH čine: Predsjednik SDP BiH, potpredsjednici, generalni sekretar SDP BiH i izabrani članovi Predsjedništva SDP BiH. Odlukom Glavnog odbora, Predsjedništvo se može proširiti za 3 člana. Predsjedništvo SDP BiH po funkciji čine i nosioci najviših izvršnih i zakonodavnih funkcija na nivou BiH i entiteta, kao i predsjednici klubova poslanika/zastupnika SDP BiH u predstavničkim domovima na nivou BiH i entiteta za period dok obavljaju te funkcije. Ukoliko se izborom članova Predsjedništva SDP BiH ne osigura odgovarajuća teritorijalna, nacionalna, socijalna, starosna i spolna zastupljenost, Glavni odbor SDP BiH može povećati broj članova Predsjedništva SDP BiH do tri člana u cilju osiguranja odgovarajuće zastupljenosti. Odredba prethodnog stava adekvatno se primjenjuje i na sastav predsjedništava svih nivoa organizovanja SDP BiH. Članovi predsjedništva SDP BiH mogu se zadužiti za određena područja rada.

Član 65.

Predsjedništvo SDP BiH :

- provodi Program SDP BiH, odluke i stavove Kongresa i Glavnog odbora SDP BiH;
- upravlja SDP BiH između dvije sjednice Glavnog odbora SDP BiH;
- donosi odluke, zauzima stavove o aktuelnim političkim i drugim pitanjima;
- u hitnim slučajevima može donositi odluke iz nadležnosti Glavnog odbora koje je dužno podnijeti na odobrenje na prvoj narednoj sjednici Glavnog odbora SDP BiH;
- raspravlja o potrebi izmjena Programa i Statuta SDP BiH;
- donosi odluke i opće akte određene ovim Statutom;

- brine o informiranju unutar SDP BiH i donosi odluku o pokretanju internog glasila;
- donosi odluke o provođenju politike upravljanja imovinom SDP BiH;
- donosi Poslovnik o radu;
- donosi Pravilnik o kriterijima i načinu kandidovanja za izbore;
- imenuje Izborni štab;
- analizira provođenje izbornih ciljeva i izborne strategije SDP BiH;
- donosi pravilnik o unutrašnjoj organizaciji Sekretarijata;
- na prijedlog generalnog sekretara imenuje Sekretarijat;
- koordinira rad kluba poslanika SDP BiH i nosilaca funkcija u izvršnoj i zakonodavnoj vlasti BiH, Federacije BiH i Republike Srpske u cilju ostvarivanja politike SDP BiH, uz učešće predstavnika kantonalnih/regionalnih odbora SDP BiH;
- donosi odluke koje nisu u nadležnosti drugih organa SDP BiH;
- podnosi izvještaj Glavnom odboru SDP BiH o svom radu između dvije sjednice Glavnog odbora;
- formira svoja radna tijela u skladu sa Poslovnikom;
- obavlja i ostale poslove u skladu sa Statutom.

Član 66.

Predsjedništvo SDP BiH, na prijedlog Generalnog sekretara, a uz saglasnost Predsjednika SDP BiH, može donijeti odluku o raspuštanju općinskih, gradskih, kantonalnih/regionalnih i interesnih organizacija SDP BiH, kao i odluke o poništavanju izbora i raspuštanju organa općinskih, gradskih, kantonalnih/regionalnih i interesnih organizacija SDP BiH.

Prijedlog generalnog sekretara mora biti zasnovan na prethodno utvrđenom činjeničnom stanju, obrazložen i u pisanoj formi.

Član 67.

Predsjedništvo SDP BiH odluku o raspuštanju općinskih, gradskih, kantonalnih/regionalnih i interesnih organizacija SDP BiH može donijeti u slučajevima:

- prestanka njihovog rada čime se ugrožavaju programski i politički ciljevi SDP BiH;
- djelovanja koje je suprotno osnovnim političkim i programskim ciljevima SDP BiH.

Članovi raspuštene organizacije imaju pravo žalbe Glavnom odboru SDP BiH čija je odluka konačna.

Član 68.

Predsjedništvo SDP BiH odluku o poništavanju izbora organa općinskih, gradskih, kantonalnih/regionalnih i interesnih organizacija SDP BiH može donijeti u slučaju kada se utvrdi da izbor nije izvršen u skladu sa Statutom SDP BiH i odlukama organa SDP BiH.

Protiv ove odluke organ čiji je izbor poništen u roku od 8 dana može izjaviti zahtjev za preispitivanje statutarosti odluke Nadzornom odboru SDP BiH koji je dužan u roku od 15 dana donijeti odluku

Odluka Nadzornog odbora ja konačna.

Član 69.

Predsjedništvo SDP BiH odluku o raspuštanju organa općinskih, gradskih, kantonalnih/regionalnih i interesnih organizacija SDP BiH može donijeti u slučajevima:

- neizvršavanja obaveza koje proističu iz odluka viših organa SDP BiH;
- zastoja u njihovom radu kojim se ugrožavaju djelovanje organizacije SDP BiH, kao i njeni programski i politički ciljevi;
- djelovanja koje je suprotno osnovnim političkim i programskim ciljevima SDP BiH.

Predsjedništvo SDP BiH prilikom raspuštanja organizacija i organa, odnosno poništavanja izbora organa dužno je donijeti mjere kojima se osigurava funkcionisanje organizacije, organa ili interesnog oblika organizovanja u skladu sa Statutom SDP BiH, te utvrditi obaveze viših nivoa organizovanja u tom procesu.

Do izbora novih organa Predsjedništvo SDP BiH imenuje povjerenika koji su dužni u roku od 60 dana organizirati konferenciju.

Član 70.

Članovi raspuštenih organa imaju pravo žalbe Glavnom odboru SDP BiH čija je odluka konačna.

Član 71.

Protiv konačne odluke o raspuštanju organa općinskih, gradskih, kantonalnih/regionalnih i interesnih organizacija SDP BiH u roku od 15 dana od dana dostavljanja, nezadovoljna strana može podnijeti zahtjev za preispitivanje statutarnosti odluke Nadzornom odboru SDP BiH. Nadzorni odbor je dužan u roku od 30 dana preispitati osporenu odluku kada je u pitanju njena usklađenosti sa Statutom. Nakon provedenog postupka, Nadzorni odbor može utvrditi da osporenom odlukom nije povrijeđen Statut SDP BiH i odbiti zahtjev ili u slučaju utvrđenih povreda Statuta naložiti organu koji je donio odluku da obnovi postupak.

Član 72.

Sjednice Predsjedništva SDP BiH održavaju se, u pravilu jednom mjesečno a saziva ih Predsjednik SDP BiH.

U slučaju odsutnosti ili spriječenosti Predsjednika SDP BiH, sjednicu saziva jedan od potpredsjednika na način utvrđen Poslovníkom.

Predsjedništvo SDP BiH podnosi godišnji izvještaj o svom radu Glavnom odboru SDP BiH.

IV 1.4 Predsjednik SDP BiH

Član 73.

Predsjednika SDP BiH bira Kongres SDP BiH.

Predsjednik SDP BiH rukovodi SDP BiH i stara se o sprovođenju odluka Kongresa SDP BiH.

Predsjednik SDP BiH upravlja SDP BiH između dvije sjednice Predsjedništva SDP BiH.

Mandat Predsjednika SDP BiH traje četiri godine.

Kandidate za Predsjednika SDP BiH predlaže Glavni odbor SDP BiH ili najmanje jedna petina delegata Kongresa SDP BiH.

Za Predsjednika SDP BiH izabran je kandidat koji dobije natpolovičnu većinu glasova prisutnih delegata Kongresa.

Funkcija Predsjednika SDP BiH i funkcija člana Glavnog odbora SDP BiH su nespojive.

Ako nijedan kandidat ne dobije potrebnu većinu, izbor se ponavlja između dva kandidata koji su dobili najviše glasova.

Izabran je kandidat koji u drugom krugu glasanja dobije više glasova.

U slučaju odsutnosti, Predsjednika SDP BiH zamjenjuje jedan od potpredsjednika SDP BiH koga Predsjednik SDP BiH ovlasti.

Član 74.

Predsjednik SDP BiH:

- predstavlja i zastupa SDP BiH u javnom, političkom životu i pravnom prometu, u skladu sa zakonima, Statutom i Programom SDP BiH;
- osigurava jedinstvo djelovanja svih organa SDP BiH;
- saziva Kongres na osnovu ovog Statuta ili kad ocijeni da je to neophodno zbog grubog narušavanja statutarnih i programskih odredbi;

- saziva, prema potrebi, Predsjednike/ kantonalnih, gradskih i općinskih organizacija radi dogovaranja o mjerama efikasnijeg provođenja politike SDP BiH;
- rukovodi Predsjedništvom SDP BiH;
- obavlja i druge poslove u skladu sa Statutom SDP BiH;
- u hitnim slučajevima može donijeti odluke iz nadležnosti Predsjedništva SDP BiH koju je dužan podnijeti na odobrenje Predsjedništvu SDP BiH na prvoj narednoj sjednici.

Predsjednik SDP BiH najmanje jednom godišnje podnosi izvještaj o svom radu Glavnom odboru SDP BiH.

Član 75.

Predsjednik SDP BiH može prije isteka mandata podnijeti ostavku uz obrazloženje. U slučaju ostavke Predsjednika SDP BiH ili ukoliko Predsjednik SDP BiH bude višom silom spriječen da obavlja svoju funkciju, Glavni odbor SDP BiH određuje jednog od potpredsjednika SDP BiH za vršioca dužnosti Predsjednika SDP BiH.

Član 76.

Na prijedlog Glavnog odbora SDP BiH, Nadzornog odbora SDP BiH ili pedeset delegata Kongresa SDP BiH može se na Kongresu SDP BiH pokrenuti pitanje povjerenja Predsjedniku SDP BiH.

Glasanje o povjerenju može tražiti i sam Predsjednik SDP BiH.

Odluka o izglasavanju nepovjerenja je donesena ako je za nju glasala većina od prisutnih delegata Kongresa SDP BiH.

Ako se izglasa nepovjerenje Predsjedniku SDP BiH, prestaje mu mandat u trenutku izglasavanja nepovjerenja.

Ako Kongres SDP BiH ne prihvati prijedlog za izglasavanje nepovjerenja, a prijedlog je podnio Glavni odbor SDP BiH ili Nadzorni odbor SDP BiH, Kongres SDP BiH može donijeti odluku o raspuštanju Glavnog odbora SDP BiH, odnosno Nadzornog odbora SDP BiH, nakon čega se pristupa izboru novog Glavnog odbora SDP BiH, odnosno Nadzornog odbora SDP BiH.

IV 1.4 A Potpredsjednici SDP BiH

Član 77.

SDP BiH ima pet potpredsjednika SDP BiH od kojih najmanje jedan mora biti manjinskog spola. Bira ih Glavni odbor SDP BiH, iz reda svojih članova, na vrijeme od četiri godine.

Potpredsjednici SDP BiH ne mogu u isto vrijeme biti predsjednici, potpredsjednici ili sekretari organizacija ili interesnih oblika SDP BiH na bilo kojem nivou organizovanja.

Za potpredsjednika SDP BiH izabraće se kandidat koji dobije kvalifikovanu većinu glasova članova Glavnog odbora SDP BiH.

Ako ni jedan kandidat ne dobije potrebnu većinu, izbor se ponavlja između dvojice kandidata koji su dobili najviše glasova.

Izabran je kandidat koji u drugom krugu glasanja dobije više glasova.

Potpredsjednici SDP BiH se zadužuju za pojedina područja ostvarivanja programske orijentacije SDP BiH.

IV 1.5 Nadzorni odbor SDP BiH

Član 78.

Nadzorni odbor SDP BiH broji jedanaest članova, koje bira Kongres SDP BiH na period od četiri godine.

Nadzorni odbor SDP BiH na prvoj sjednici bira predsjednika i zamjenika predsjednika Nadzornog odbora SDP BiH.

Do izbora predsjednika Nadzornog odbora SDP BiH, istim predsjedava najstariji član Nadzornog odbora.

Članovi Nadzornog odbora SDP BiH ne mogu istovremeno biti članovi nijednog drugog organa

SDP BiH, na istom nivou organizovanja.

Odluke Nadzornog odbora SDP BiH su obavezni da provode organi SDP BiH na koje se iste odnose.

Način rada Nadzornog odbora SDP BiH bliže se uređuje Poslovníkom.

Određbe člana 78-80. ovog Statuta primjenjuju se na Nadzorne odbore svih nivoa organizovanja SDP BiH.

Član 79.

Informacija o radu Nadzornog odbora SDP BiH najmanje jednom godišnje upućuje se članstvu SDP BiH.

Član 80.

Nadzorni odbor SDP BiH:

- ocjenjuje zakonitost rada organa SDP BiH i nadzire finansijsko poslovanje SDP BiH;
- ocjenjuje statutarnost odluka i drugih akata organa SDP BiH;
- učestvuje u pripremi izmjena i dopuna Statuta SDP BiH;
- odlučuje o žalbama u drugom stepenu na odluke o isključenju i brisanju iz evidencije;
- odlučuje po zahtjevu za preispitivanje statutarnosti konačnih odluka o osporavanju prijema u članstvo SDP BiH.

Odluke Nadzornog odbora su konačne.

IV 2.1 Generalni sekretar SDP BiH

Član 81.

Generalnog sekretara SDP BiH bira Glavni odbor SDP BiH, iz reda svojih članova, na period od četiri godine.

Za generalnog sekretara SDP BiH izabran je kandidat koji dobije kvalifikovanu većinu glasova članova Glavnog odbora SDP BiH.

Ako ni jedan kandidat ne dobije potrebnu većinu, izbor se ponavlja između dvojice kandidata koji su dobili najviše glasova.

Izabran je kandidat koji u drugom krugu glasanja dobije više glasova.

Član 82.

Generalni sekretar SDP BiH:

- rukovodi Sekretarijatom, brine o organizaciji rada i stručnom i operativnom izvršavanju poslova i zadataka SDP BiH;
- posebno se stara o organizacionom jačanju i osposobljavanju organizacija SDP BiH;
- predlaže Predsjedništvu donošenje pravilnika o unutrašnjoj organizaciji Sekretarijata;
- predlaže Predsjedništvu imenovanje članova Sekretarijata;
- pomaže predsjednicima organa SDP BiH u sazivanju sjednica i organizaciji rada;
- brine se i odgovoran je za izvršavanje odluka Predsjednika, Predsjedništva, Glavnog i Nadzornog odbora;
- usklađuje rad općinskih, gradskih i kantonalnih/regionalnih organizacija SDP BiH;
- prema potrebi saziva koordinaciju sekretara kantonalnih/regionalnih odbora;
- usklađuje rad savjeta organiziranih na nivou SDP BiH;
- obavlja i druge poslove u skladu sa Statutom SDP BiH.

Generalni sekretar za svoj rad odgovara Predsjedniku, Predsjedništvu i Glavnom odboru.

IV 2.2 Sekretarijat SDP BiH

Član 83.

Sekretarijat SDP BiH je izvršno i stručno-operativno tijelo Glavnog odbora, Predsjedništva SDP BiH i Predsjednika SDP BiH.

Sekretarijat je odgovoran za provođenje stavova Glavnog odbora i Predsjedništva SDP BiH. Radom Sekretarijata SDP BiH rukovodi generalni sekretar SDP BiH.

Član 84.

Sekretarijat SDP BiH čine generalni sekretar SDP BiH, poslovni direktor SDP BiH i sekretari zaduženi za pojedina područja rada.

Odluku o broju članova Sekretarijata SDP BiH, kao i o djelokrugu njihovog rada, na prijedlog generalnog sekretara SDP BiH, donosi Predsjedništvo SDP BiH.

Članovi Sekretarijata SDP BiH mogu dužnost obavljati profesionalno, o čemu odluku donosi Predsjedništvo SDP BiH.

Član 85.

Svi zaposleni u SDP BiH čine radnu zajednicu SDP BiH.

Odnosi unutar radne zajednice utvrđuju se opštim aktima: Standardima, Normativima i Pravilnicima, koje na osnovu pozitivnih propisa i Statuta SDP BiH na prijedlog generalnog sekretara donosi Predsjedništvo SDP BiH.

Član 86.

SDP BiH ima poslovnog direktora koji rukovodi Radnom zajednicom i stručnom službom Stranke. Predsjedništvo SDP BiH, na prijedlog generalnog sekretara, imenuje poslovnog direktora. Poslovni direktor za svoj rad odgovara Predsjedniku SDP BiH, generalnom sekretaru i Predsjedništvu SDP BiH. Po funkciji je ovlaštena osoba za podnošenje finansijskih izvještaja izbornoj komisiji.

Poslovni direktor se koordinirano sa generalnim sekretarom SDP BiH brine o prihodima i rashodima Stranke, upravlja njenom imovinom, vodi brigu o zaposlenim licima, brine o sticanju, čuvanju, zaštiti i otuđenju imovine Stranke, organizira finansiranje aktivnosti Stranke, te obavljaju druge poslove finansijsko-poslovnog karaktera.

Član 87.

Poslovni direktor sa generalnim sekretarom SDP BiH koordinira i izrađuje finansijski plan SDP BiH za iduću fiskalnu godinu, te koordinira izradu finansijskih planova organizacija SDP BiH.

Godišnji finansijski plan SDP BiH dostavlja se Glavnom odboru na usvajanje.

Poslovni direktor sa generalnim sekretarom SDP BiH izrađuje izvještaj o finansijskom poslovanju SDP BiH u prethodnoj godini i podnosi ga Glavnom odboru na usvajanje.

Član 88.

Ugovore o sticanju, otuđenju i opterećenju imovine SDP BiH prije zaključivanja na prijedlog poslovnog direktora odobrava Predsjedništvo SDP BiH.

IV 3. Konvencija SDP BiH

Član 89.

Glavni odbor donosi odluku o mjestu i vremenu održavanja programske i promotivne Konvencije SDP BiH.

Član 90.

Programska Konvencija SDP BiH raspravlja o temeljnim pitanjima koja se odnose na Bosnu i Hercegovinu i SDP BiH.

Promotivna Konvencija SDP BiH održava se povodom predstavljanja kandidata SDP BiH na

izborima za sve nivoe vlasti.

Konvencija nema nadležnost izmjena Programa, Statuta i donošenja odluka iz nadležnosti Kongresa.

Član 91.

Delegate Konvencije SDP BiH čine:

- članovi Glavnog odbora SDP BiH i Nadzornog odbora,
- delegati kantonalnih/regionalnih i općinskih organizacija čiji se broj određuju Odlukom Glavnog odbora SDP BiH o sazivanju Konvencije,
- po jedan delegat iz formiranih interesnih oblika organizovanja članova SDP BiH,
- drugi učesnici, zavisno od teme koju Konvencija razmatra.

Član 92.

Svečana Konvencija SDP BiH održava se povodom obilježavanja značajnih datuma i događaja u BiH

Mjesto, vrijeme i učesnike Svečane Konvencije SDP BiH svojom odlukom određuje Predsjedništvo SDP BiH.

Član 93.

Kantonalni/Regionalni odbor donosi odluku o mjestu i vremenu održavanja konvencija na nivou svoje organizacije.

IV 4.1. Kantonalna/regionalna organizacije SDP BiH

Član 94.

Kantonalna/regionalna organizacija je oblik povezivanja i organizovanja članstva i organizacija SDP BiH u kantonu, odnosno izbornoj jedinici.

Područje kantonalne/regionalne organizacije SDP BiH obuhvata, u pravilu, administrativnu ili izbornu jedinicu BiH.

Kantonalna/regionalna organizacija SDP BiH osniva se odlukom Glavnog odbora SDP BiH, djeluje na osnovu ovlaštenja u skladu sa Statutom i nema svojstvo pravnog lica.

Član 95.

Organi kantonalne/regionalne organizacije SDP BiH su:

- Konferencija kantonalne/regionalne organizacije;
- Kantonalni/regionalni odbor;
- Nadzorni odbor;
- Predsjedništvo;
- Predsjednik.

Svi organi osim predsjednika donose poslovnik o svom radu.

Član 96.

Konferenciju kantonalne/regionalne organizacije, sačinjavaju delegati koji su izabrani u općinskim organizacijama na predstavničkom načelu, razmjerno broju članova općinskih organizacija, vodeći računa o izbornom rezultatu, s tim da svaka općinska organizacija mora biti zastupljena s najmanje dva člana.

Konferencija može biti izborna i izvještajna.

Izborna Konferencija održava se u pravilu svake četiri godine.

Izveštajna Konferencija održava se poslije održanih općih ili općinskih izbora. Konferenciju saziva predsjednik kantonalne/regionalne organizacije na osnovu odluke kantonalnog/regionalnog odbora SDP BiH, a može se sazvati i na inicijativu trećine općinskih organizacija.

Ukoliko predsjednik kantonalne/regionalne organizacije u roku od 30 dana ne postupi prema zahtjevu iz prethodnog stava konferenciju mogu sazvati ovlašteni predlagači koji tada pripremaju konferenciju i dogovaraju se oko toga ko će rukovoditi njenim radom.

Odluka kantonalnog/regionalnog odbora sadrži pravila o izboru i broju članova Konferencije, prijedlog dnevnog reda, te teme i izvještaje za Konferenciju.

Član 97.

Kantonalna/regionalna Konferencija SDP BiH:

- bira na četiri godine članove kantonalnog/regionalnog odbora, Nadzorni odbor, Predsjednika;
- donosi Poslovnik;
- donosi Program rada;
- raspravlja i odlučuje o izvještaju o radu kantonalnog/regionalnog odbora koji podnosi predsjednik organizacije;
- odlučuje o izvještaju o radu Nadzornog odbora;
- u slučaju potrebe odlučuje o povjerenju izabranim članovima organa kantonalne/regionalne organizacije.

Član 98.

Konferencija bira Kantonalni/regionalni odbor SDP BiH razmjerno broju članova SDP BiH u općinskim organizacijama SDP BiH, vodeći računa o nacionalnoj, spolnoj i starosnoj strukturi, s tim da svaka općinska organizacija SDP BiH mora biti zastupljena sa najmanje jednim članom. Broj članova kantonalnog/regionalnog odbora utvrđuje se Odlukom o organiziranju kantonalne/regionalne organizacije.

Predsjednici općinskih i gradskih organizacija sa područja kantonalne/regionalne organizacije i predsjednici interesnih oblika organizovanja su po funkciji članovi kantonalnog/regionalnog odbora.

Član 99.

Kantonalni/regionalni odbor SDP BiH:

- upravlja organizacijom između dvije Konferencije i sastaje se u pravilu najmanje jednom u tri mjeseca;
- provodi Program i Statut SDP BiH i odluke organa SDP BiH;
- bira Predsjedništvo kantonalne/regionalne organizacije SDP BiH, potpredsjednike i sekretara kantonalnih/regionalnih organizacija, iz reda svojih članova koji su direktno izabrani u odbor;
- razrješava Predsjedništvo kantonalne/regionalne organizacije SDP BiH, potpredsjednike i sekretara kantonalnih/regionalnih organizacija;
- donosi godišnji Plan rada i razmatra izvještaj o realizaciji;
- podstiče i koordinira aktivnost i saradnju općinskih i gradskih organizacija;
- predlaže kandidate za organe SDP BiH i za zastupnike SDP BiH u Parlamentarnoj skupštini BiH, Parlamentu Federacije BiH, Narodnoj skupštini Republike Srpske;
- utvrđuje kandidate SDP BiH za kantonalnu skupštinu;
- zauzima političke stavove o pitanjima iz nadležnosti kantona/regije;
- donosi odluku o organiziranju kantonalne/regionalne organizacije;
- donosi poslovnik;
- donosi Odluku o brisanju iz evidencije i isključenju;
- najmanje jednom godišnje razmatra rad članova kantonalne skupštine koji su članovi SDP BiH i predstavnika SDP BiH u izvršnoj vlasti kantona i organa koje bira konferencija, te o tome zauzima stavove i donosi odluke;

- u skladu sa odredbom člana 55. ovog Statuta može kooptirati nove članove, odnosno donijeti odluku o povećanju broja članova.

Član 100.

U cilju osiguranja jedinstvenog djelovanja SDP BiH, kantonalni/regionalni odbor je dužan da svoje političke stavove i zaključke temelji na Programu i Statutu SDP BiH i stavovima Glavnog odbora SDP BiH.

Kantonalni/regionalni odbor pri utvrđivanju svojih stavova, donošenju političkih odluka i zaključaka, obavezan je da razmotri prijedloge i sugestije općinskih i gradskih odbora SDP BiH.

Općinski i gradski odbori SDP BiH obavezni su da provode stavove, odluke i zaključke kantonalnog/regionalnog odbora, koji se odnose na politička, ekonomska, socijalna i druga pitanja na nivou kantona/regije, odnosno koja su u nadležnosti kantona/regije.

Član 101.

Kantonalnom/regionalnom organizacijom SDP BiH između dviju sjednica kantonalnog/regionalnog odbora rukovodi Predsjedništvo kantonalne/regionalne organizacije koje čine Predsjednik, potpredsjednici, sekretar kantonalne/regionalne organizacije i 5 do 7 članova koje bira kantonalni/regionalni odbora na svojoj konstituirajućoj sjednici.

Kod izbora potpredsjednika, sekretara i članova Predsjedništva organizacije, kantonalni odbor je dužan, gdje god je to moguće, voditi računa o nacionalnoj, dobnoj i spolnoj strukturi, a u skladu sa ovim Statutom.

Predsjedništvom kantonalne/regionalne organizacije rukovodi Predsjednik kantonalne/regionalne organizacije.

Predsjednik, potpredsjednici i sekretar kantonalne/regionalne organizacije SDP BiH ne mogu u isto vrijeme biti predsjednici, potpredsjednici ili sekretari organizacija ili interesnih oblika SDP BiH na bilo kojem nivou organizovanja.

Članove predsjedništva kantonalne/regionalne organizacije čine i nosioci najviših izvršnih i zakonodavnih funkcija izabranih ispred SDP BiH na nivou kantona/regije, kao i predsjednik kluba poslanika SDP BiH u kantonalnoj skupštini za period dok obavljaju te funkcije.

Odredbe prethodnog stava primjenjuju se i na sastav Predsjedništva SDP BiH Distrikta Brčko, predsjedništava gradskih organizacija SDP BiH i predsjedništava općinskih organizacija SDP BiH. Na sjednicama Predsjedništva kantonalne/regionalne organizacije po potrebi učestvuju i predsjednici općinskih i gradskih organizacija sa područja kantona/regije.

Član 102.

Predsjednik kantonalne/regionalne organizacije saziva, predsjedava i vodi sjednice kantonalnog/regionalnog odbora i Predsjedništva, ostvaruje uvid i brine se o radu i aktivnostima organizacije i provođenju odluka kantonalne/regionalne organizacije..

Na sjednice kantonalnog/regionalnog odbora obavezno se pozivaju poslanici SDP BiH u kantonalnoj skupštini, članovi kantonalne izvršne vlasti iz reda SDP BiH, članovi organa SDP BiH i zastupnici u entitetskom i Parlamentu BiH koji imaju prebivalište na području kantona/regije.

Član 103.

Predsjedništvo kantonalne/regionalne organizacije:

- sastaje se najmanje jednom mjesečno;
- utvrđuje prijedlog političkih ocjena i političkih stavova;
- podstiče stranačko i interesno organizovanje članova;
- koordinira rad organa općinskih i gradskih organizacija na području kantona/regije;
- organizira i provodi kampanju na području svog kantona/regije;
- obavlja i druge poslove koje mu povjeri kantonalni/regionalni odbor iz svoje nadležnosti.

Član 104.

Sekretar kantonalne/regionalne organizacije provodi zadatke koje dobiva od kantonalnog/regionalnog odbora, Predsjedništva i Predsjednika, organizuje vođenje administrativno-finansijskih poslova i pomaže u radu gradskim i općinskim organizacijama.

Član 105.

Nadzorni odbor kantonalne/regionalne organizacije ima najmanje 5 članova o čemu posebnu odluku donosi kantonalna/regionalna konferencija.

Nadzorni odbor nadzire statutarnost rada kantonalne organizacije i izabranih organa.

Članovi nadzornog odbora ne mogu istovremeno biti nosioci dužnosti niti članovi drugih organa i tijela SDP BiH na istom nivou organizovanja, osim konferencije.

Predsjednik nadzornog odbora redovno se poziva na sjednice kantonalnog/regionalnog odbora.

Na rad Nadzornog odbora primjenjuju se odredbe člana 78. – 80. ovog Statuta.

IV 4.2 Regionalna koordinacija

Član 106.

U okviru SDP BiH organizuje se regionalna koordinacija.

Osnovni, ali ne isključivi, princip za organizovanje regionalne koordinacije jeste transentitetski princip.

Osnovni cilj organizovanja regionalne koordinacije jeste osiguravanje razvoja i jačanje organizacija SDP BiH u skladu sa Programom SDP BiH i ovim Statutom

Glavni odbor SDP BiH svojom odlukom definiše teritorijalni obuhvat regionalne koordinacije kao i sadržaj njene aktivnosti.

Glavni odbor SDP BiH može svojom Odlukom definisati i druge principe i ciljeve organizovanja regionalne koordinacije.

IV 4.3 Općinska i gradska organizacija SDP BiH

Član 107.

Općinska i gradska organizacija SDP BiH je osnovni oblik povezivanja i organiziranja članova SDP BiH na području jedinice lokalne samouprave sa statusom grada odnosno općine (u daljnjem tekstu: organizacija SDP BiH).

Članovi SDP BiH povezani u organizaciju SDP BiH organiziraju se i djeluju u osnovnim organizacijama SDP BiH odnosno interesnim organizacijama SDP BiH, osnovanim na području te organizacije u skladu sa ovim Statutom.

Područje djelovanja općinske odnosno gradske organizacije SDP BiH odgovara u pravilu administrativno - teritorijalnom području općine odnosno grada.

Iznimno, tamo gdje nije organizirana općinska organizacija SDP BiH, članovi SDP BiH aktivnosti ostvaruju u najbližoj općinskoj ili gradskoj organizaciji SDP BiH.

Organizacije SDP BiH u skladu s Programom i Statutom SDP BiH djeluju samostalno na svom području vodeći računa o uspješnoj realizaciji Programa i politike SDP BiH na nivou svog političkog djelovanja, ali i ostvarivanju Programa i politike SDP BiH u cjelini.

Odluku o osnivanju organizacije SDP BiH donosi Glavni odbor SDP BiH na prijedlog Predsjedništva kantonalne/regionalne organizacije ili generalnog sekretara SDP BiH.

Organizacija nema svojstvo pravnog lica i djeluje na osnovu ovlaštenja u skladu sa Statutom SDP BiH.

Član 108.

Organi organizacije SDP BiH su: Konferencija, Općinski odnosno Gradski odbor, Nadzorni odbor, Predsjedništvo i Predsjednik.

Član 109.

Općinska odnosno gradska konferencija SDP BiH se organizira na predstavničkom principu ako organizacija broji više od 200 članova. U protivnom, svi članovi SDP BiH sa područja organizacije

SDP BiH čine konferenciju.

Konferencija može biti izborna i izvještajna.

Općinska odnosno gradska izborna konferencija se održava, u pravilu, svake četiri godine.

Izvještajna Konferencija održava se poslije održanih općih ili općinskih izbora.

Konferenciju saziva predsjednik organizacije na osnovu odluke općinskog odnosno gradskog odbora SDP BiH.

Odluka općinskog odnosno gradskog odbora sadrži pravila o izboru i broju članova Konferencije, prijedlog dnevnog reda, te teme i izvještaje za Konferenciju.

Općinski odnosno gradski odbor utvrđuje sastav konferencije na osnovu prijedloga kandidata koje daju osnovne organizacije, vodeći računa o nacionalnoj, spolnoj i starosnoj strukturi, kao i zastupljenosti osnovnih organizacija.

Izuzetno predsjednik organizacije dužan je sazvati konferenciju na zahtjev kantonalnog/regionalnog odbora, Predsjedništva SDP BiH, Glavnog odbora SDP BiH, Nadzornog odbora SDP BiH, nadzornog odbora organizacije ili općinskog odnosno gradskog odbora.

Ukoliko predsjednik organizacije u roku od 30 dana ne postupi prema zahtjevu iz prethodnog stava konferenciju mogu sazvati ovlašteni predlagači koji tada pripremaju konferenciju i dogovaraju se oko toga ko će rukovoditi njenim radom.

Član 110.

Općinska konferencija:

- donosi program rada općinske organizacije;
- bira na četiri godine Općinski odbor; Nadzorni odbor i Predsjednika;
- odlučuje o izvještaju Predsjednika i organa općinske organizacije SDP BiH;
- donosi Poslovnik o svom radu;
- raspravlja i odlučuje o izvještaju o radu općinskog odnosno gradskog odbora koji podnosi predsjednik organizacije;
- odlučuje o izvještaju o radu Nadzornog odbora;
- u slučaju potrebe odlučuje o povjerenju izabranim članovima organa općinske odnosno gradske organizacije.

Član 111.

Konferencija bira općinski odnosno gradski odbor, vodeći računa o nacionalnoj, spolnoj i starosnoj strukturi, kao i zastupljenost osnovnih organizacija, odnosno interesnih organizacija.

Općinski odnosno gradski odbor čine: Predsjednik, potpredsjednici, članovi Predsjedništva, sekretar i članovi odbora koje bira konferencija, te predsjednici interesnih oblika organizovanja na općinskom nivou.

Broj članova općinskog odbora utvrđuje se Odlukom o organiziranju općinske organizacije.

Općinski odbor donosi odluku kojom se organizira i uređuje rad SDP BiH na njegovom području.

Ovom odlukom se uređuje formiranje osnovnih i interesnih organizacija.

U radu općinskog odbora po potrebi mogu učestvovati predsjednici osnovnih organizacija i povjerenici.

Na sjednice Općinskog/Gradskog odbora pozivaju se vijećnici SDP BiH u općinskom, odnosno gradskom vijeću, članovi viših organa SDP BiH i poslanici/zastupnici u kantonalnoj skupštini, entitetskim parlamentima i Parlamentu BiH koji imaju prebivalište na području općine.

Član 112.

Općinski odnosno gradski odbor:

- rukovodi organizacijom između dvije konferencije i sastaje se u pravilu najmanje jednom u tri mjeseca;
- provodi Program i Statut SDP BiH i odluke viših organa SDP BiH;
- bira Predsjedništvo organizacije; potpredsjednike i sekretara organizacije, iz reda svojih članova izabranih direktno na konferenciji;
- razrješava Predsjedništvo organizacije; potpredsjednike i sekretara organizacije;

- donosi godišnji Plan rada i razmatra izvještaj o realizaciji;
- organizira i provodi izborne aktivnosti na području općine odnosno grada;
- predlaže kandidate za organe SDP BiH i za zastupnike SDP BiH u Parlamentarnoj skupštini BiH, Parlamentu Federacije BiH, Narodnoj skupštini Republike Srpske, Kantonalnoj skupštini;
- utvrđuje kandidate SDP BiH za organe vlasti lokalne samouprave;
- zauzima političke stavove o pitanjima iz svoje nadležnosti;
- donosi odluku o organiziranju općinske odnosno gradske organizacije;
- donosi poslovnik;
- donosi Odluku o brisanju iz evidencije i isključenju;
- najmanje jednom godišnje razmatra rad članova općinskih odnosno gradskih vijeća ili skupštine opštine koji su članovi SDP BiH i predstavnika SDP BiH u lokalnoj administraciji i organa koje bira konferencija, te o tome zauzima stavove i donosi odluke;
- u skladu sa odredbom člana 42. ovog Statuta može kooptirati nove članove, odnosno donijeti odluku o povećanju broja članova.

Član 113.

Organizacijom između dvije sjednice odbora rukovodi Predsjedništvo organizacije kojeg čine Predsjednik, potpredsjednici, sekretar i 3 i više članova koje bira općinski odnosno gradski odbor iz reda svojih članova.

Kod izbora potpredsjednika, sekretara i članova Predsjedništva organizacije, općinski odbor je dužan, gdje god je to moguće, voditi računa o nacionalnoj, dobnoj i spolnoj strukturi, a u skladu sa ovim Statutom.

Predsjednik, potpredsjednici i sekretar općinske/gradske organizacije SDP BiH ne mogu u isto vrijeme biti predsjednici, potpredsjednici ili sekretari organizacija ili interesnih oblika SDP BiH na bilo kojem nivou organizovanja.

Članovi Predsjedništva organizacije, po funkciji, su i predsjednik kluba vijećnika/odbornika i, ukoliko su izabrani, načelnik općine, predsjedavajući općinskog vijeća/skupštine opštine.

Predsjedništvom organizacije SDP BiH rukovodi i predsjedava Predsjednik općinske organizacije SDP BiH.

Član 114.

Predsjedništvo općinske odnosno gradske organizacije:

- sastaje se najmanje jednom mjesečno;
- raspravlja o aktuelnim pitanjima i problemima općine, odnosno grada te predlaže općinskom, odnosno gradskom odboru utvrđivanje političkih ocjena i političkih stavova;
- podstiče stranačko i interesno organizovanje članova;
- koordinira rad osnovnih organizacija i interesnih oblika organizovanja na području općine/grada;
- organizira i provodi kampanju na području svoje općine odnosno grada;
- obavlja i druge poslove koje mu povjeri općinski odnosno gradski odbor iz svoje nadležnosti.

Član 115.

Predsjednik općinske/gradske organizacije SDP BiH ujedno je i predsjednik općinskog/gradskog odbora SDP BiH.

Predsjednik općinske/gradske organizacije SDP BiH saziva i vodi sjednice općinskog/gradskog odbora SDP BiH i Predsjedništva i brine se o provođenju odluka, te u skladu s ovlaštenjima, predstavlja općinsku/gradsku organizaciju.

Predsjednik općinske/gradske organizacije SDP BiH dužan je najmanje jednom godišnje općinskom/gradskom odboru SDP BiH podnijeti izvještaj o svom radu.

Član 116.

U općini ili gradu u kojem ne postoji organizacija SDP BiH kantonalni/regionalni odbor dužan je imenovati povjerenika kome je osnovno pravo i obaveza stvaranje uslova za osnivanje organizacije.

Općinski povjerenik ima prava i dužnosti organa općinske organizacije SDP BiH.

U organizaciji koja ima manje od 30 članova u pravilu se ne osniva općinski, odnosno gradski odbor, već svi članovi, osim članova nadzornog odbora organizacije, čine općinski odnosno gradski odbor.

Član 117.

Sekretar općinske/gradske organizacije provodi zadatke koje dobiva od općinskog/gradskog odbora, Predsjedništva i Predsjednika, organizuje vođenje administrativno-finansijskih poslova, te pomaže u radu osnovnih organizacija i interesnih oblika organizovanja.

Član 118.

Nadzorni odbor općinske odnosno gradske organizacije ima najmanje 3 člana o čemu posebnu odluku donosi općinska odnosno gradska konferencija.

Nadzorni odbor nadzire statutarnost rada organizacije i izabranih organa.

Članovi nadzornog odbora ne mogu istovremeno biti nosioci dužnosti niti članovi drugih organa i tijela SDP BiH na istom nivou organizovanja, osim konferencije.

Predsjednik nadzornog odbora redovno se poziva na sjednice općinskog odnosno gradskog odbora.

Na rad Nadzornog odbora primjenjuju se odredbe člana 78. – 80. ovog Statuta.

IV 4.4 Osnovna organizacija

Član 119.

Osnovna organizacija SDP BiH je oblik organizovanja članova SDP BiH u okviru općinske/gradske organizacije koja obuhvata područje jedne mjesne zajednice čije su granice utvrđene Statutom jedinica lokalne samouprave.

U okviru jedne mjesne zajednice zavisno od broja članova i veličine osnovne organizacije mogu se organizovati više osnovnih organizacija što se reguliše odlukom o organizovanju općinske/gradske organizacije.

Osnovna organizacija organizirana na području organizacije u skladu sa odlukom općinskog odnosno gradskog odbora, bira: Predsjednika i blagajnika/ a po potrebi i Predsjedništvo od 3 i više članova koji su odgovorni općinskom odnosno gradskom odboru SDP BiH, odnosno Predsjedništvu općinske ili gradske organizacije SDP BiH.

Osnovna organizacija učestvuje u svim raspravama o ključnim političkim pitanjima Bosne i Hercegovine, kao i o svim ključnim pitanjima SDP BiH, vrši prijem novih članova SDP BiH, formuliše pitanja, prijedloge i inicijative koji se mogu uputiti svim organima SDP BiH, uključujući i Kongres, evidentira i ističe kandidate za sve funkcije u SDP BiH kao i za funkcije u predstavničkim i izvršnim organima i razmatra izvještaje i programe općinskih organizacija.

U radu osnovne organizacije učestvuju članovi SDP BiH, shodno odredbi iz stava 3. člana 9. ovog Statuta.

U mjesnim zajednicama u kojima ne postoje uslovi za formiranje osnovne organizacije SDP BiH općinski odbor je dužan imenovati povjerenika kome je osnovno pravo i obaveza stvaranja uslova za osnivanje organizacije.

Član 120.

Na izbor, rad i odlučivanje o povjerenju Predsjedniku, potpredsjednicima, sekretaru i članovima predsjedništva kantonalne/regionalne, gradske odnosno općinske organizacije shodno će se primjenjivati odredbe ovog Statuta koje se odnose na izbor i odlučivanje o povjerenju Predsjedniku SDP BiH, ukoliko ovim Statutom nije drugačije uređeno.

IV 5. Organizacija SDP BiH u Gradu Sarajevu

Član 121.

Odredbe ovog Statuta koje regulišu pitanja organizacije i funkcionisanja gradskih organizacija zbog specifičnosti organizovanja ne odnese se na Grad Sarajevo.

Glavni odbor svojom odlukom utvrđuje način konstituisanja, nadležnosti, odgovornosti i funkcionisanja gradske organizacije SDP BiH.

IV 6. Savjeti Glavnog odbora i radna tijela Predsjedništva

Član 122.

Savjeti SDP BiH su stručna savjetodavna tijela Glavnog odbora i drugih tijela SDP BiH, a osnivaju se za pojedina područja javnih politika koja su posebno važna za političku djelatnost SDP BiH. Glavni odbor svojom odlukom formira i imenuje svoje savjete u skladu sa potrebama SDP BiH, te regulira njihov broj i način rada.

Predsjednik i članovi savjeta biraju se među istaknutim stručnjacima SDP BiH za pojedine javne politike ili stručnjacima koji nisu članovi Stranke, a prihvataju socijaldemokratske vrijednosti i osnovna programska načela SDP BiH.

Predsjednika Savjeta bira Glavni odbor na prijedlog Predsjednika SDP BiH.

Predsjedništvo SDP BiH odlukom može formirati svoja radna tijela za praćenje određenih pitanja, sugerisanje stavova i obilježavanja važnih datuma i događaja.

Predsjedništvo svojom odlukom formira i imenuje svoja radna tijela, te regulira njihov broj i način rada.

Član 123.

Kantonalne/regionalne, gradske i općinske organizacije mogu osnivati svoje savjete, kao stručna savjetodavna tijela pripadajućeg nivoa organizovanja.

Odluku o osnivanju, sastavu, sadržaju i načinu njihovog rada donose kantonalni/regionalni, gradski i općinski odbori u skladu sa odredbama Glavnog odbora o formiranju njegovih savjeta.

V - KANDIDIRANJE I UČEŠĆE SDP BiH U VLASTI

V 1. Kandidiranje

Član 124.

Kandidate SDP BiH za zakonodavne, predstavničke i organe izvršne vlasti utvrđuju odbori na odgovarajućem nivou organiziranja SDP BiH, u skladu sa Pravilnikom o načinu predlaganja i opozivu kandidata kojeg donosi Glavni odbor SDP BiH.

Pripadnici oba spola moraju biti ravnomjerno raspoređeni na kandidatskim listama.

V 2. Zastupnici i nosioci izvršne vlasti

Član 125.

Članovi SDP BiH u zakonodavnim, predstavničkim i organima izvršne vlasti stvaralački iniciraju aktivnosti i zauzimaju stavove po svim pitanjima, sa stanovišta relevantnih programskih i drugih stavova SDP BiH.

Nosioci javnih funkcija ispred SDP BiH dužni su izgrađivati i čuvati vlastiti javni i politički integritet, kao i ugled SDP BiH.

Član 126.

Članovima SDP BiH koji ostvaruju dodatne prihode po osnovu vršenja zastupničkih i drugih funkcija uvećava se članarina, prema odluci Glavnog odbora SDP BiH.

V 2.1 Klubovi zastupnika SDP BiH

Član 127.

Zastupnici SDP BiH formiraju klub zastupnika SDP BiH radi usklađivanja svog djelovanja, zauzimanja stavova i vođenja parlamentarne akcije.
Nezavisni zastupnici u zakonodavnom tijelu mogu po sopstvenoj želji biti članovi kluba zastupnika SDP BiH o čemu klub zastupnika SDP BiH donosi posebnu odluku.

Član 128.

Članovi kluba zastupnika SDP BiH biraju predsjednika i zamjenika predsjednika kluba iz reda zastupnika članova SDP BiH.
Predsjednik kluba zastupnika SDP BiH rukovodi radom kluba zastupnika i dužan je redovno izvještavati organe odgovarajuće organizacije SDP BiH o radu kluba. Organ iz prethodnog stava je dužan razmotriti sva pitanja koja pred njega iznese klub zastupnika SDP BiH.
Klub zastupnika SDP BiH donosi poslovnik o svom radu.
Klubovi zastupnika dužni su podnijeti izvještaj o svome radu kada odgovarajući odbor istog nivoa teritorijalne organizacije od njih to zatraži, a obavezno jednom godišnje i dužni su razmotriti inicijative i prijedloge tog odbora SDP BiH, te o zauzetim stavovima izvijestiti odgovarajući odbor SDP BiH.

Član 129.

U radu kluba zastupnika SDP BiH učestvuju nosioci izvršne vlasti ispred SDP BiH, a po potrebi i predstavnici organa SDP BiH.
U cilju provođenja programskih i političkih inicijativa, organ SDP BiH, odnosno nosioci izvršne vlasti ispred SDP BiH, mogu inicirati sastanak kluba zastupnika SDP BiH.

Član 130.

Kandidati koji prihvataju kandidaturu za zastupnika u zakonodavnim tijelima, bilo kojeg nivoa, dužni su potpisati obavezujuću izjavu ili ugovor o političkom djelovanju u zakonodavnoj vlasti na programskim opredjeljenjima SDP BiH.
Sadržaj izjave utvrđuje Glavni odbor SDP BiH.
Ako zastupnik u zakonodavnom tijelu krši Program SDP BiH, u toku mandata promijeni stranku ili pređe u neovisne poslanike ili vijećnike/odbornike odgovarajući odbor ga isključuje iz SDP BiH i traži da podnese ostavku na zastupničku dužnost.

V 2.2 Klubovi vijećnika SDP BiH

Član 131.

Odredbe čl. 127 - 130. shodno se primjenjuju na organiziranje i rad klubova vijećnika SDP BiH u jedinicama lokalne samouprave.

V 3. Koordinacija učešća u vlasti

Član 132.

Predsjedništvo SDP BiH koordinira rad klubova zastupnika na državnom i entitetskom nivou kao i rad nosilaca funkcija u izvršnoj i zakonodavnoj vlasti, održavanjem sjednica, uz učešće predsjednika kluba zastupnika i nosilaca funkcija u izvršnoj i zakonodavnoj vlasti.
Predsjedništvo kantonalne/regionalne, gradske i općinske organizacije koordinira rad kluba zastupnika, odnosno kluba vijećnika, održavanjem sjednica, uz učešće predsjednika kluba zastupnika SDP BiH, odnosno kluba vijećnika SDP BiH, nosilaca funkcija u zakonodavnoj i izvršnoj vlasti i Predsjednika gradskih, općinskih, odnosno osnovnih organizacija SDP BiH u cilju ostvarivanja politike SDP BiH i pokretanja inicijativa.

VI – IMOVINA, STICANJE, KORIŠTENJE I RASPOLAGANJE SREDSTVIMA SDP BIH

Član 133.

Imovinu SDP BiH čine nekretnine i pokretne stvari, sredstva na računima, kao i prava kojih je titular SDP BiH ili neki od njegovih prethodnika.

Vlasnička ovlaštenja na nekretninama ima samo SDP BiH.

Član 134.

Finansijska politika SDP BiH se zasniva na slijedećim načelima:

- finansijska politika je sastavni dio ukupne politike SDP BiH;
- svrha finansijske politike SDP BiH je da osigura materijalnu osnovu partijskih akcija i političku suverenost SDP BiH, kako u odnosu na pojedince i grupe tako i u odnosu na državu;
- niko nema pravo, ni pojedinac ni organ, da obavlja takve finansijske transakcije koje bi ugrozile nezavisnost SDP BiH ili je dovele u poziciju pružanja političkih koncesija;
- u SDP BiH se ne mogu kupovati funkcije i položaj, svi su članovi ravnopravni, neovisno o njihovoj privatnoj materijalnoj moći, i pod istim uvjetima su im dostupne sve funkcije u SDP BiH.

Član 135.

SDP BiH stiže sredstva od članarine, dobrovoljnih priloga, donacija, poklona, zavještanja, budžeta političko-teritorijalnih jedinica, prihoda od imovine i vlastite privredne djelatnosti, učešća u sufinansiranju zajedničkih projekata, kao i iz drugih izvora, u skladu sa zakonom.

Član 136.

Na osnovu prijedloga iz općinskih organizacija SDP BiH, Glavni odbor SDP BiH odlukom utvrđuje kriterije i način sticanja, raspolaganja, upravljanja, korištenja i raspodjele materijalnih sredstava u SDP BiH na svim nivoima organizacije SDP BiH i svim oblicima organizovanja, sa ciljem da se obezbjedi materijalna sredstva za osnovno funkcioniranje općinskih organizacija.

Glavni odbor, odlukom iz prvog stava ovog člana može utvrditi da se finansijsko poslovanje vrši preko jednog računa u cilju efikasnijeg ostvarivanja aktivnosti.

Predsjedništvo SDP BiH, u dogovoru sa organizacijama SDP BiH, svakih šest mjeseci provodi unutar SDP BiH finansijsko izravnavanje, u cilju razvijanja partijskog rada i finansijske pomoći organizacijama kojima je to potrebno.

Član 137.

Visinu članarine, način prikupljanja, uvjete za oslobađanje od njenog plaćanja, kao i način raspodjele tih sredstava, utvrđuje i uređuje Glavni odbor na prijedlog Predsjedništva SDP BiH. Ako član duže od šest mjeseci ne plaća članarinu, a nije oslobođen od njenog plaćanja, općinska odnosno gradska organizacija dužna je dostaviti pismenu opomenu da to učini u roku od 30 dana, uz upozorenje da će se neplaćanje tretirati kao izjava o istupanju iz članstva.

Član 138.

Dobrovoljne priloge, poklone i zavještanja, SDP BiH prihvata ako se time neće kompromitirati. Za davanje izjava o prihvatu nadležno je rukovodstvo organizacije u kojoj je poklon, dobrovoljni prilog ili zavještanje učinjeno, a ako se radi o nekretninama, Glavni odbor SDP BiH. Dobrovoljni prilozima i donatorstva se evidentiraju posebno, a organi SDP BiH se javno na sjednicama upoznaju sa donatorima.

VII – NAUČNA, INFORMATIVNA, IZDAVAČKA I HUMANITARNA DJELATNOST

Član 139.

Glavni odbor SDP BiH je nosilac zakonskih prava i obaveza izdavača.
Glavni odbor SDP BiH donosi odluku o naučnoistraživačkoj djelatnosti organizacija u SDP BiH.
Odluke o osnivanju javnog glasila i izdavačkoj djelatnosti SDP BiH, te o drugim oblicima informativne djelatnosti donosi Predsjedništvo SDP BiH.
Organizacije SDP BiH, prema potrebama, u skladu sa zakonom, formiraju humanitarne organizacije, a uz saglasnost Glavnog odbora SDP BiH.

VIII - RASPUŠTANJE SDP BiH

Član 140.

SDP BiH može prestati djelovati odlukom Kongresa SDP BiH za koju je potrebno dvije trećine glasova ukupnog broja delegata Kongresa uz prethodnu suglasnost najmanje dvije trećine općinskih/gradskih organizacija.
Odlukom o prestanku rada Kongres će odlučiti o imovini SDP BiH.

IX - RAVNOPRAVNOST SPOLOVA

Član 141.

Gramatička terminologija u ovom Statutu podrazumijeva uključivanje oba spola.
Kvote o zastupljenosti manje zastupljenog spola se primjenjuju na sve nivoe organizovanja partije.

X - PRIJELAZNE I ZAVRŠNE ODREDBE

Član 142.

Izmjena i dopuna Statuta vrši se na način i po postupku propisanom za njegovo donošenje.

Član 143.

Organizacije SDP BiH dužne su uskladiti svoju organizaciju sa ovim Statutom u roku od 90 dana od dana stupanja na snagu ovog Statuta.

Član 144.

Statut SDP BiH stupio je na snagu danom donošenja na 3. Kongresu SDP BiH održanom 05.02.2005. godine.

Član 145.

Izmjene i dopune Statuta stupaju na snagu danom donošenja.